



Canllaw i Wasanaethau Ar ôl y Canlyniadau

Cyfres Tachwedd 2020
Cyfres Ionawr 2021

Cynnwys

1. Cyflwyniad	3
2. A oes modd i mi gael copi o sgript wedi'i marcio cyn gwneud cais am adolygiad o'r marcio?	4
3. Pwy sy'n cynnal yr adolygiadau o'r marcio neu gymedroli a sut maen nhw'n cael eu monitro?	5
4. Sut mae adolygiad yn cael ei gynnal?	6
5. Beth yw gwall cymedroli neu wall marcio?	7
6. Sut y dylid gwneud ceisiadau ac a fydd CBAC yn derbyn ceisiadau am adolygiadau o farcio neu gymedroli'n uniongyrchol gan ymgeiswyr?	8
7. I ble fydd y llythyrau ynghylch y penderfyniadau am adolygiadau yn cael eu hanfon a pha wybodaeth fydd yn cael ei chynnwys?	8
8. A oes proses apelio?	9
9. A fydd CBAC yn cynnal ymchwiliad pellach os oes pryder ynghylch marcio carfan?	9

1. Cyflwyniad

Mae CBAC wedi ymrwymo i sicrhau bod canlyniadau'r holl ymgeiswyr yn cael eu cyhoeddi'n gywir ar ddiwrnod y canlyniadau. Dilynwn brosesau sicrhau ansawdd er mwyn gwneud yn siŵr bod y canlyniadau'n gywir ac mae'r rhain i'w gweld ar ein [gwefan](#).

Sylweddolwn, fodd bynnag, y gall gwallau ddigwydd ac rydym am sicrhau bod ein gwasanaethau ar ôl y canlyniadau yn cywiro unrhyw wallau mewn modd amserol. Mae'r gwasanaethau a'r dyddiadau cau fel a ganlyn:

- Gwasanaeth 1: Ail-wiriad clericyddol
- Gwasanaeth 2: Adolygiad o'r marcio, ail-wiriad clericyddol a datganiad o'r marciau yn ôl uned/cydran ar gyfer ymgeisydd unigol
- Gwasanaeth 3: Adolygiad o gymedroli, os ydyn ni wedi newid marciau'r ganolfan yn ystod y cymedroli (nid yw'r gwasanaeth hwn ar gael i ymgeiswyr unigol)
- Mynediad i sgriptiau (gweler adran 2 isod)

Cyfes chymwysterau a	Diwrnod y Canlyniadau	Dyddiad cau i wneud cais am sgript blaenoriaeth cyn Adolygiad o'r Marcio*	Dyddiad cau i wneud cais am ail-wiriad clericyddol, Adolygiad o'r Marcio neu Gymedroli	Dyddiad cau i wneud cais am sgript i gefnogi addysgu a dysgu
Tachwedd 2020 TAG, Project Estynedig a Lefel 3 Tystysgrifau a Diplomâu	17 Rhagfyr 2020	14 Ionawr 2021	4 Chwefror 2021	4 Chwefror 2021
Tachwedd 2020 TGAU (Cymraeg, Saesneg, Mathemateg, Mathemateg – Rhifedd)	14 Ionawr 2021	28 Ionawr 2021	18 Chwefror 2021	18 Chwefror 2021
Tachwedd 2020 – pob TGAU arall	11 Chwefror 2021	25 Chwefror 2021	18 Mawrth 2021	18 Mawrth 2021
Ionawr 2021 TGAU, Lefel 1/2 Dyfarniadau a Thystysgrifau, Llwybrau Mynediad	4 Mawrth	18 Mawrth	12 Ebrill	12 Ebrill

*Ar gyfer cyfes Tachwedd 2020, byddwn yn treialu gwasanaeth sgriptiau heb eu hanodi rhad ac am ddim ar gyfer y cymwysterau TGAU canlynol:

- CBAC Saesneg Iaith (3700U20-1 a 3700U30-1)
- CBAC Cymraeg Iaith (3000N20-1 a 3000N30-1)
- Eduqas Saesneg Iaith (C700U10-1 a C700U20-1)

Gall canolfannau llwytho sgriptiau i lawr ar ran ymgeiswyr o wefan ddiogel CBAC sydd hefyd yn cynnwys y cyfarwyddiadau ar y broses hon. **Sylwer, mae'n rhaid i ganolfan gael caniatâd yr ymgeisydd cyn llwytho sgript i lawr neu wneud cais am sgript.** Bydd sgriptiau ar gael i'w llwytho i lawr o ddiwrnod y canlyniadau tan ddyddiad cau gwasanaethau ar ôl y canlyniadau. **Noder, nid yw'n bosibl cyflwyno cais am adolygiad o'r marcio ar ôl y dyddiad cau.**

Rhaid i ganolfannau gael caniatâd ysgrifenedig gan ymgeisydd cyn cyflwyno cais am ail-wiriad clericyddol ac adolygiad o'r marcio gan y gall marc a gradd yr ymgeisydd fynd i fyny, i lawr neu aros yr un fath. Ni ellir canslo cais unwaith y bydd CBAC wedi cyhoeddi canlyniad, o dan unrhyw amgylchiadau. Nid oes angen cydsyniad ymgeisydd ar gyfer adolygiad o gymedroli gan na fydd y radd wreiddiol yn cael ei gostwng. Fodd bynnag, dylai ymgeiswyr a chanolfannau fod yn ymwybodol y byddai marc wedi'i ostwng yn cael ei drosglwyddo i ardystiad yn y dyfodol.

Os hoffai canolfan ganslo cais cyn cyhoeddi'r canlyniad yna bydd angen cysylltu â PostResultsServices@wjec.co.uk mewn pryd, ac mae'n bosibl y bydd angen talu am ganslo.

Mae ein holl ffioedd a therfynau amser cyflwyno ceisiadau wedi'u cyhoeddi ar ein [gwefan](#) cyn dechrau pob cyfres arholiadau.

Mae canllaw'r CGC Ar ôl y Canlyniadau ar gael [yma](#). Mae CBAC yn dilyn yr un gweithdrefnau CGC ym mis Ionawr ag ar gyfer cyfresi Mehefin a Thachwedd.

2. A oes modd i mi gael copi o sgript wedi'i marcio cyn gwneud cais am adolygiad o'r marcio?

Oes, gellir gwneud ceisiadau ond mae'n rhaid eu derbyn erbyn y dyddiad cau. Byddwn yn sicrhau bod y sgript ar gael i'r ganolfan neu ymgeisydd preifat heb fod yn hwyrach na 2 wythnos cyn y dyddiad cau ar gyfer cyflwyno cais am adolygiad o'r marcio. Bydd y sgript yn cynnwys marciau ac anodiadau'r arholwr, fel y bo'n briodol.

Dylai canolfannau wneud ceisiadau am sgriptiau ymgeiswyr mewnol drwy wefan ddiogel CBAC. Gall ymgeiswyr preifat wneud cais drwy e-bostio PostResultsServices@wjec.co.uk gan nodi enw'r ymgeisydd, rhif yr ymgeisydd, enw a rhif y ganolfan mewn unrhyw ohebiaeth.

3. Pwy sy'n cynnal yr adolygiadau o'r marcio neu gymedroli a sut maen nhw'n cael eu monitro?

Mae CBAC yn penodi adolygwyr sy'n uwch arholwyr neu gymedrolwyr profiadol. Mae CBAC yn cadw cofrestr o fuddiannau ar gyfer ei holl benodedigion sy'n sicrhau nad oes gwrthdaro buddiannau gan adolygwr wrth gyflawni'r rôl o adolygu. Mae'r adolygwr yn unigolyn gwahanol i'r arholwr neu'r cymedrolwr gwreiddiol.

Mae'r holl adolygwyr yn cyflawni hyfforddiant gorfodol yn eu rôl o adolygu. Mae'r hyfforddiant ar gyfer adolygiadau o'r marcio yn cynnwys gwylio a deall cynnwys fideo hyfforddiant yr adolygwr, ail-ymgyfarwyddo â'r papur cwestiynau a'r cynllun marcio, adolygu sgriptiau'r hyfforddiant safoni gwreiddiol a ddarparwyd i arholwyr, deall 'rhesymoldeb' a sut mae'n cael ei gymhwyso yn y broses adolygu, a darllen a deall y cyfarwyddiadau a'r ddogfen ganllaw a ddarperir gan CBAC. Yn yr hyfforddiant ar gyfer adolygiadau o'r marcio bydd yr adolygwr yn ymgyfarwyddo â gofynion y fanyleb a'r cyfarwyddiadau a roddwyd yng nghynhadledd gychwynnol safoni'r cymedrolwyr, y cynllun marcio a'r safonau a sefydlwyd yn y gynhadledd safoni a'i chymhwyso yn ystod y broses gymedroli wreiddiol, a'r ddogfen cyfarwyddiadau a chanllawiau.

Mae CBAC yn monitro pob adolygwr yn ofalus trwy:

- sicrhau bod pob adolygwr wedi'i hyfforddi cyn dechrau ar unrhyw adolygiad o farcio/cymedroli.
- craffu ar nifer y newidiadau i farciau sydd wedi'u gwneud, a chofnodi unrhyw faterion sydd wedi'u nodi ynghylch perfformiad arholwyr/cymedrolwyr
- gwirio bod penderfyniadau yn gyson â'r safon a osodwyd yn y gynhadledd safoni wreiddiol
- sicrhau bod yr holl adolygwyr yn glynu wrth y *Cyfarwyddiadau i Adolygwyr* sy'n bodloni gofynion yr amodau rheoleiddio, yn enwedig mewn perthynas â sicrhau mai dim ond gwallau marcio/cymedroli sy'n cael eu cywiro.

Os, yn ystod y monitro, bydd CBAC yn nodi nad yw adolygwr wedi cyflawni ei rôl yn gywir, byddwn yn cymryd camau i gywiro'r sefyllfa. Gallai hyn gynnwys ailhyfforddi neu ail-ddyrannu'r adolygiadau i adolygwr arall.

4. Sut mae adolygiad yn cael ei gynnal?

Darperir copi o sgript neu waith ymgeisydd wedi'i g/chymedroli, copi o'r cynllun marcio, y marciau a'r anodiadau gwreiddiol i'r adolygwr. Yn nogfen GCE and GCSE Qualification Level Guidance Ofqual nodir y canlynol: *'anyone carrying out a review must consider the original mark given by a trained assessor'* (h.y. yr arholwr neu'r cymedrolwr gwreiddiol) *'and only make a change to the mark where the marking of the assessment included a marking error'*.

Rôl yr adolygwr yw penderfynu a yw'r arholwr/cymedrolwr gwreiddiol wedi cymhwyso'r cynllun marcio'n gyson, yn iawn ac yn deg ac a oedd y marc a ddyfarnwyd yn farc rhesymol. Nid ymarfer ail-farcio nac ail-gymedroli yw'r adolygiad oni bai y nodir gwall gyda'r marcio/cymedroli gwreiddiol.

Bydd yr adolygwr yn ystyried pob tasg a'r asesiad yn ei gyfanrwydd ac yn penderfynu p'un a ellid bod wedi dyfarnu'n rhesymol y marc gwreiddiol/gradd wreiddiol. Bydd y broses adolygu yn:

- Penderfynu a fu gwall gweinyddol yn y marcio (e.e. methu â marcio rhan o'r asesiad neu wall cyfrifo)
- Penderfynu p'un a yw'r dasg yn un lle mae marc 'cywir' neu 'anghywir' yn unig neu'n un sy'n gofyn am arfer barn academaidd
- Penderfynu a yw'r marc cywir wedi'i roi os mai dim ond marc 'cywir' neu 'anghywir' sydd yno a chywiro'r marc os oes gwall wedi digwydd
- Penderfynu, os yw barn academaidd wedi'i harfer, a oedd y marcio yn cynnwys unrhyw ymarfer afresymol o farn academaidd. Lle canfyddir hyn, caiff y gwall ei gywiro

Os oes cyfle i newid y marciau/gradd, bydd yr adolygwr yn dogfennu'r rhesymau. Bydd y rhesymau fel a ganlyn:

- gwall gweinyddol
- ni farciwyd y sgript yn gwbl gytûn â'r cynllun marcio
- roedd y marcio gwreiddiol yn rhy hael
- roedd y marcio gwreiddiol yn rhy lym
- roedd y marcio gwreiddiol yn hael ac yn llym ar draws cwestiynau gwahanol.

Ni fydd yr adolygwr yn newid y marciau oni bai bod gwall marcio.

5. Beth yw gwall cymedroli neu wall marcio?

Mae gwall cymedroli yn cael ei ddiffinio fel canlyniad na ellid yn rhesymol fod wedi'i gyrraedd o ystyried gwaith yr ymgeisydd, marcio'r ganolfan ar y gwaith hwnnw, y meini prawf y mae perfformiad ymgeiswyr wedi'u gwahaniaethu yn eu herbyn a gweithdrefnau cymedroli CBAC.

Mae gwall marcio'n cael ei ddiffinio fel marc na ellid yn rhesymol fod wedi'i ddyfarnu i ymatebion ymgeisydd pan fydd y cynllun marcio ar gyfer y papur a gweithdrefnau marcio eraill CBAC wedi'u cymhwyso'n gywir.

Gall gwall yn y marcio neu gymedroli ddigwydd o ganlyniad i:

- gwall gweinyddol
- methiant i gymhwyso'r cynllun marcio os mai dim ond ateb 'cywir' neu 'anghywir' sydd i dasg
- arfer barn academiaidd yn afresymol.

Gall gwall marcio ddigwydd, er enghraifft, os nad yw arholwr wedi cymhwyso'r cynllun marcio yn iawn neu heb farcio ymateb teilwng.

Fodd bynnag, mewn llawer o asesiadau, fel traethodau Saesneg neu Hanes, nid oes 'marc cywir' a 'marc anghywir'. Mae'r mathau hyn o asesiadau yn gofyn i arholwyr/cymedrolwyr ddefnyddio'u barn academiaidd. Gallai dau arholwr/cymedrolwr hyfforddedig sy'n arfer eu barn academiaidd yn rhesymol a heb wneud camgymeriad, ddyfarnu marciau gwahanol i ateb yr un ymgeisydd ac nid ystyrir hyn yn wall marcio.

Yn unol â gofynion y rheoleiddwyr, bydd CBAC bob amser yn newid marc os oes gwall wedi bod ond ni fydd yn newid un marc rhesymol am farc arall mewn achos o wahaniaeth barn academiaidd. Mae Canllaw Lefel Cymhwyster Ofqual yn nodi mai'r 'man cychwyn, bob amser, i ystyried a arferwyd barn academiaidd yw'r marc sy'n cael ei herio (ac nid unrhyw farc arall y dylid bod wedi'i ddyfarnu ym marn y Dysgwr/Ganolfan)'.

Mae enghreifftiau o gymhwyso barn academiaidd yn afresymol yn cynnwys:

- marcio sy'n rhy lym neu hael y tu hwnt i'r hyn y gellid ei ddisgwyl gan arholwr/gymedrolwr hyfforddedig yn cymhwyso'r cynllun marcio yn gywir
- lle na roddwyd marc i ran o ateb ond lle y dylai arholwr/cymedrolwr hyfforddedig a gwybodus sy'n ymddwyn yn rhesymol fod wedi rhoi marc
- lle mae marcio ateb yn awgrymu nad oedd gan yr arholwr/ cymedrolwr unrhyw sail resymegol dros ddyfarnu ei m/farciau.

6. Sut y dylid gwneud ceisiadau ac a fydd CBAC yn derbyn ceisiadau am adolygiadau o farcio neu gymedroli'n uniongyrchol gan ymgeiswyr?

Mae'n well gan CBAC weithio gyda staff canolfan sy'n ymwybodol o'r safon a ddisgwyllir yng ngwaith eu hymgeiswyr. Rhaid i geisiadau ar gyfer pob ymgeisydd mewnol gael eu gwneud gan ganolfan ymgeisydd gan ddefnyddio gwefan ddiogel CBAC. Byddem yn annog ymgeiswyr preifat i ofyn am gyngor ac i wneud cais drwy eu canolfan gofrestru ond gallant hefyd wneud cais yn uniongyrchol drwy e-bostio ein Gwasanaeth Ar ôl y Canlyniadau – PostResultsServices@wjec.co.uk yn nodi enw'r ymgeisydd, rhif yr ymgeisydd, rhif ac enw'r ganolfan mewn unrhyw ohebiaeth.

O ran yr unedau a asesir yn fewnol, dim ond y sampl gwreiddiol a gyflwynwyd y byddwn yn ei adolygu, a hynny dim ond os addaswyd marciau. Felly, dim ond gan ganolfannau y byddwn yn derbyn ceisiadau am adolygiadau o gymedroli, nid yn uniongyrchol gan ymgeiswyr neu rieni ymgeiswyr. Mae'n ofynnol i ganolfannau gael gweithdrefn i alluogi ymgeiswyr i apelio yn erbyn penderfyniadau'r ganolfan cyn cyflwyno marciau i CBAC.

Mewn achosion lle mae canolfannau wedi cau, ac felly nid ydynt yn gweithredu fel ysgol/ coleg mwyach pan fydd eu cyn-fyfyrwyr yn derbyn eu canlyniadau, byddwn yn ystyried y dull gorau ar gyfer myfyrwyr yr effeithiwyd arnynt, y mae arnynt angen gwneud cais am adolygiad o'r marcio.

7. I ble fydd y llythyrau ynghylch y penderfyniadau am adolygiadau yn cael eu hanfon a pha wybodaeth fydd yn cael ei chynnwys?

Bydd CBAC yn rhoi gwybod am ganlyniad adolygiad o'r marcio i ganolfan ymgeisydd neu'n uniongyrchol i ymgeisydd preifat. Os bu gwall yn y marcio, byddwn yn rhoi gwybod am newid yn y marc, y newid yn y radd (os yw'n berthnasol) a'r rheswm. Mae'r rhesymau dros newid mewn marc/gradd yn cael eu categorio fel:

- gwall gweinyddol
- ni farciwyd y sgrïpt yn gwbl gytûn â'r cynllun marcio
- roedd y marcio gwreiddiol yn rhy hael
- roedd y marcio gwreiddiol yn rhy lym
- roedd y marcio gwreiddiol yn hael ac yn llym ar draws cwestiynau gwahanol.

Mewn achos o adolygiad o'r cymedroli, bydd CBAC yn rhoi adroddiad i'r ganolfan am yr adolygiad o'r cymedroli, ni waeth a yw'r canlyniad wedi newid neu'n aros yr un fath.

8. A oes proses apelio?

Os yw'r canolfannau'n teimlo bod gwall o hyd, gallant gyflwyno cais am apêl yn erbyn canlyniad adolygiad o'r marcio neu'r cymedroli fel yr amlinellir yn [nogfen Apeliadau'r CGC](#) a dogfen CBAC, 'Apeliadau – Canllaw i Ganolfannau, [ar gael yma](#). Rhaid cyflwyno apêl o fewn 30 diwrnod calendr i gyhoeddi canlyniad yr adolygiad o'r marcio/cymedroli. Gall ymgeisydd preifat gyflwyno apêl yn erbyn canlyniad adolygiad o'r marcio drwy e-bostio ein Tîm Cydymffurfio – [appeals](#) @wjec.co.uk yn nodi enw a rhif yr ymgeisydd ac enw a rhif y ganolfan mewn unrhyw ohebiaeth.

9. A fydd CBAC yn cynnal ymchwiliad pellach os oes pryder ynghylch marcio carfan?

Drwy gydol y cyfnod adolygu'r marcio, mae CBAC yn monitro canlyniadau'r adolygiadau i asesu p'un a oes unrhyw bryderon y mae angen eu hymchwilio ymhellach. Mae ein proses fonitro yn cynnwys adnabod **'newidiadau arwyddocaol i farciau'**.

Diffiniad o **newidiadau arwyddocaol i farciau** yw naill ai:

- mae hanner, neu fwy, o'r ceisiadau (rhaid eu bod yn ffurfio o leiaf 10% o garfan gyfan y ganolfan) a gyflwynwyd ar gyfer un gydran neu uned benodol, yn newid o fwy na 5% o gyfanswm y marciau crai sydd ar gael am yr asesiad penodol

NEU

- mae chwarter, neu fwy, o'r ceisiadau (y mae'n rhaid iddyn nhw ffurfio o leiaf 10% o garfan gyfan y ganolfan) a gyflwynwyd ar gyfer un gydran neu uned benodol, yn newid o fwy na 10% o gyfanswm y marciau crai sydd ar gael am yr asesiad penodol.

Os ydym yn canfod newidiadau sylweddol yn y marciau mewn cydran neu uned benodol, cynghorir y ganolfan i gyflwyno ceisiadau pellach am adolygiadau o'r marcio **o fewn pum diwrnod gwaith**, gan ddewis pob ymgeisydd sy'n peri pryder. Fodd bynnag, **rhaid** i'r ganolfan dderbyn cydsyniad pob ymgeisydd a gyflwynir am adolygiad o'r marcio, gan y gall marciau godi, gostwng neu aros yr un peth.

Ceir enghreifftiau isod sy'n dangos sefyllfaoedd lle byddai CBAC yn ystyried ac yn gwrthod ymchwilio ymhellach.

a) Canolfan 1

Cofrestrwyd 50 ymgeisydd gan Ganolfan 1 ar gyfer TGAU Drama, ac mae'r ganolfan yn cyflwyno cais i adolygu'r marcio ar gyfer un papur, â chyfanswm o 80 marc, i 5 ymgeisydd. Mae marc un ymgeisydd yn newid o 50 i 53 o ganlyniad i'r adolygiad o'r marcio. Mae marciau'r pedwar ymgeisydd arall yn aros yr un peth.

*Nid ystyrir hyn am ymchwiliad pellach gan nad oes tuedd o newid arwyddocaol yn y marciau. Er bod y ganolfan wedi gwneud cais dros o leiaf 10% o'r garfan, dim ond **un** ymgeisydd sydd*

wedi gweld newid yn y marciau. Yn ogystal, nid yw'r marc wedi newid o **fwy na 5% o gyfanswm y marciau crai sydd ar gael am yr asesiad penodol hwn.**

b) Canolfan 2

Cofrestrwyd 200 ymgeisydd gan Ganolfan 2 ar gyfer TGAU Saesneg Iaith, ac mae'r ganolfan yn cyflwyno cais am adolygiad o'r marcio ar gyfer un papur, â chyfanswm o 100 marc, i 10 ymgeisydd.

Mae canlyniad yr adolygiad o'r marcio fel a ganlyn:

Mae marc un ymgeisydd yn cael ei newid o 70 i 76

Mae marc un ymgeisydd yn cael ei newid o 50 i 43

Mae marc un ymgeisydd yn cael ei newid o 80 i 83

Mae marciau saith ymgeisydd yn aros yr un peth

*Nid ystyrir hyn am ymchwiliad pellach gan nad oes tuedd o newid arwyddocaol yn y marciau. Nid yw'r ganolfan wedi gwneud cais ar gyfer **o leiaf 10% o'r garfan.** Mae tystiolaeth o farciau dau ymgeisydd yn newid (yn codi ac yn gostwng) **o fwy na 5% o gyfanswm y marciau crai ar gyfer y papur.** Fodd bynnag, mae'r marciau ar gyfer un ymgeisydd wedi **symud o lai na 5% o gyfanswm y marciau crai** ac mae marciau'r saith ymgeisydd sy'n weddill wedi aros yr un peth.*

c) Canolfan 3

Cofrestrwyd 20 ymgeisydd gan Ganolfan 3 ar gyfer TAG Bioleg, ac mae'r ganolfan yn cyflwyno cais i adolygu'r marcio ar gyfer un papur, â chyfanswm o 60 marc, i 2 ymgeisydd.

Mae canlyniad yr adolygiad o'r marcio fel a ganlyn:

Mae marc un ymgeisydd yn cael ei newid o 40 i 44

Mae marc un ymgeisydd yn cael ei newid o 50 i 43

*Ystyrir hyn am ymchwiliad pellach. Mae'r ganolfan wedi gwneud cais ar gyfer **o leiaf 10% o'r garfan.** Mae tystiolaeth o farciau dau ymgeisydd yn newid (yn codi ac yn gostwng) **o fwy na 5% o gyfanswm y marciau crai ar gyfer y papur.** Cyngorior y ganolfan i gyflwyno unrhyw geisiadau pellach am adolygiad o'r marcio o fewn pum diwrnod gwaith, gan ddewis pob ymgeisydd sy'n peri pryder. Atgoffir y ganolfan bod angen cydsyniad pob ymgeisydd a gyflwynir am adolygiad o'r marcio, gan y gall marciau godi, gostwng neu aros yr un peth. Ni all canolfannau ddewis derbyn newidiadau sy'n golygu bod cynnydd yn y marciau, a gwrthod newidiadau sy'n golygu bod gostyngiad yn y marciau.*

ch) Canolfan 4

Cofrestrwyd 40 ymgeisydd gan Ganolfan 4 ar gyfer TAG Daearyddiaeth, ac mae'r ganolfan yn cyflwyno cais am adolygiad o'r marcio ar gyfer dau bapur, â chyfanswm o 80 marc, i 5 ymgeisydd.

Mae canlyniad yr adolygiad fel a ganlyn:

Papur 1

Mae marc un ymgeisydd yn cael ei newid o 60 i 50

Mae marc un ymgeisydd yn cael ei newid o 55 i 43.

Mae marc un ymgeisydd yn cael ei newid o 37 i 28.

Mae marciau dau ymgeisydd yn aros yr un peth.

Papur 2

Mae marciau'r pum ymgeisydd yn aros yr un peth.

*Ystyrir Papur 1 am ymchwiliad pellach. Mae'r ganolfan wedi gwneud cais ar gyfer **o leiaf 10% o'r garfan**. Mae tystiolaeth o farciau tri ymgeisydd **yn newid o fwy na 10% o gyfanswm marciau'r papur**. Cynghorir y ganolfan i gyflwyno unrhyw geisiadau pellach am adolygiad o'r marcio o fewn pum diwrnod gwaith, gan ddewis pob ymgeisydd sy'n peri pryder. Atgoffir y ganolfan bod angen cydsyniad pob ymgeisydd a gyflwynir am adolygiad o'r marcio, gan y gall marciau godi, gostwng neu aros yr un peth. Ni all canolfannau ddewis derbyn newidiadau sy'n golygu bod cynnydd yn y marciau, a gwrthod newidiadau sy'n golygu bod gostyngiad yn y marciau.*

Nid ystyrir papur 2 am ymchwiliad pellach gan nad oes tuedd o newid arwyddocaol yn y marciau.